

PAGTUKIB NAHANUNGOD KAY JESUS



Ang Matun-an Nimo sa Sini Nga Leksyon

Pagtuon gikan sa Biblia

Pagkawalay sayop sang Biblia

Tema sang Biblia

Bag-ong Katipan nagasugid nahanungod kay Jesus

Pagtuon gikan sa Inagihan

Inagihan sang iban

Personal nga inagihan

Mahimo ko bala ikaw pamangkuton? Sin-o sa hunahuna mo si Jesus? Ang iban nga mga katawhan nagasiling: Isa Sia ka daku nga manunodlo. Ang iban nagatawag sa Iya nga manalagna, isa ka mahigugmaon sang kaalam, isa ka dios sa katundan, ukon isa ka maayo nga tawo nga ang halimbawa dapat naton sundon.



Si Jesus isa ka daku nga manunodlo kag manalagna apang sobra pa Sia dira. Sobra pa Sia sa isa ka mahigugmaon sang kaalam ukon halimbawa para sa aton. Si Jesus wala naghalin sa katundan; busa indi naton Sia matawag nga isa ka dios sa katundan. Nagpuyo Sia sa Katung-an nga Sidlangan halos 2,000 ka tuig na nga nagligad; apang walay sapayan sini minilyon nga mga katawhan sa bilog nga kalibutan ang nagasiling nga personal nila nga nakilala Sia. Manginmatay sila para lamang sa Iya kawsa. Sin-o Sia?

Pagtuon gikan sa Biblia

Pagkawalay sayop sang Biblia



Sa pagtuon sa kon si sin-o si Jesus, makadto kita sa libro nga sa diin makakita kita sang walay sayop nga rekord sang Iya kabuhi kag mga ginatudlo — ang Biblia. Ang Biblia ginatapoan sang 66 ka mga libro nga ginsulat sang mga 35 tubtob sa 40 ka mga tawo.

Ang mga manunulat sang Biblia mga tawo nga may nagkalainlain nga mga bulohaton. Mga mangin-alamon sila, mga doktor, mga hari, mga manalagna, mga sacerdote, mga negosyante, mga mangungoma, mga manugbantay sang kamero, mga pinuno, kag mga mangingisda.

Nagkabuhi sila sa nagkalainlain nga mga panahon sa sulod sang mga 1,600 ka tuig. Tanan sila maayo nga mga tawo kag may pagkaangay sa sining mga butang:

- 1) Tanan sila nagasimba sa isa ka Dios – nga ginatawag Jehovah – ang Manunuga sang kalibutan.
- 2) Tanan sila ginpahayagan sang Dios kag nagbaton sang Iya mensahe para sa mga katawhan.
- 3) Tanan sila nagsulat sang kon ano ang ginsiling sang Dios sa ila.



Ginbantayan sang Dios nga ining mga tawo indi makahimo sang sayop samtang nagasulat sila sang rekord sang nagligad, mga tagna sang palaabuton nga mga hitabo, kag sang Iya mga mensahe para sa mga katawhan sa tagsa ka panag-on kag kahimtangan. Madamo nga mga tinuig ang nagligad, ining ginbugnaan sang Dios nga mga sinulatan gintingob sa isa ka libro – ang Balaan nga Kasulatan.

Dios



2 Pedro 1:21. Kay wala gid sing tagna nga nag-abot bangod sa kabubot-on sang tawo, kundi ang mga tawo nga gintandog sang Espiritu Santo nagpamulong gikan sa Dios.

Ang Biblia walay sayop sa tagsa ka detalye. Walay sayop ini kon isandig sa kasaysayan sang maragtas. Walay sayop ini kon isandig sa siyensya. Ang walay sayop kag pat-od nga katumanan sang mga ginatos ka tagna nahanungod sa mga kapungsuran kag sang mga tawo nga nasambit nagapamatuod nga ini amo gid ang Pulong sang Dios. Masaligan naton kon ano ang ginasiling sini nahanungod kay Jesus.

Buhata Ini

Kon wala pa nimo mabasa ang pahina 7 tubtob sa 10, buhata ini sa wala mo pa masabat ang mga pamangkot. Markahi sang x ang tupad sang husto nga sabat sa tagsa ka pamangkot sa idalum.

1. Sin-o si Jesus?

- a) Isa lamang ka daku nga manunudlo.
- b) Isa lamang ka manalagna.
- k) Isa ka dios sa katundan.
- d) Isa nga labaw pa sang isa lamang ka manunudlo, manalagna, ukon mahigugmaon sang kaalam.

2. Sa diin si Jesus nagpuyo?

- a) Sa Europa.
- b) Sa Katung-an nga Sidlangan.
- k) Sa Katundan

3. Sa diin ka makakita sang walay sayop nga impormasyon nahanungod kay Jesus?

- a) Sa Biblia.
- b) Sa kasaysayan sang mga taga Roma.
- k) Sa pilosopiya sang Griego.

4. Markahi ang tatlo ka mga butang nga ang mga manunulat sang Biblia nagakaangay.
- ...a) Ang tanan nagkabuhi sa amo man nga panahon.
 - ...b) Ang tanan nagasimba sa isa lamang ka Dios.
 - ...k) Ang tanan nagasimba sang madamo nga mga Dios.
 - ...d) Ang Dios nagpahayag sang Iya kaugalingon sa ila kag naghatag sang Iya mensahe.
 - ...e) Ang tanan nagsulat sang kon ano ang nagustohan nila.
 - ...g) Ang tanan nagsulat sang kon ano ang ginsiling sang Dios sa ila.
 - ...h) Ang tanan nakahimo sing sayop sa ila mga libro.

Tema sang Biblia

Nгаа nga ang 66 ka mga libro, nga ginsulat sang mga 40 ka tawo sa sobra sing 1,600 ka tuig, tingubon sa isa lamang ka libro? Bangod kay isa lamang ang tema sini tanan. Ang tanan nagapakita sa aton sang nagkalainlain nga mga bahin sang isa lamang ka larawan. Ang mga libro sang kasaysayan, kasugoan, mga ambahanon, tagna, kasaysayan sa kabuhi sang isa ka tinuga, kag praktikal nga mga ginatudlo sa Biblia may isa lamang ka nagapangibabaw nga tema. Amo ang kaluwasan sang makasala nga tawo paagi sa mahigugmaon nga Dios.



Ang tagsa ka bahin sang Biblia – ang Daan nga Katipan kag ang Bag-o nga Katipan – nagapakita sa aton sang pagkinahanglan sang tawo sang

Manluluwas kag ang paghatag sang Dios sang isa ka Manluluwas nga amo si Jesus. Ang Daan nga Katipan, ginsulat sa wala pa matawo si Jesus, nagasulat sang madamo nga mga tagna nahanungod sa Iya. Ang Bag-o nga Katipan nagasugid sa aton kon paano ang Manluluwas nagkari kag kon paano kita maluwas paagi sa Iya. Ang tema sang bug-os nga Biblia – kaluwasan para sa mga katawhan – nagapatuhoy sa kay Jesus, ang Manluluwas para sa mga katawhan.

Buhata Ini

5. Ano ang nagapangibabaw nga tema sang Biblia?
 -a) Kaluwasan paagi sa maayo nga mga kasugoan.
 -b) Kaluwasan sang makasasala nga tawo paagi sa mahigugmaon nga Dios.
 -k) Kaluwasan para sa tawo paagi sa isa ka maayo nga palibot.
6. Ano nga bahin sang Biblia ang may madamo nga tagna nahanungod sa magaabot nga Manluluwas?

.....
7. Ano nga bahin sang Biblia ang nagasugid sang kabuhi sang Manluluwas?

.....

Ang nasulat sa Bag-o nga Katipan nahanungod kay Jesus

Ang Bag-o nga Katipan nagahatag sa aton sang kasaysayan sang:

- 1) Kabuhi kag mga ginatudlo ni Jesus.
- 2) Iglesia nga Iya ginpasad.
- 3) Mga sulondon sa pagsunod kay Jesus.
- 4) Palaabuton nga mga hitabo nga may kaangtanan sa pagbalik ni Jesus.

Masaligan naton ang pagkawalay sayop sang Bag-o nga Katipan. Ang Dios nagpili sang mga tawo nga dapat magsulat sini kag ginbugnaan sila sa tagsa ka detalye sang ila bulohaton. Tatlo ka butang ang makapat-od sa aton nga husto ang rekord nga pagpamatuod sang mga manunulat, 1) ginbugnaan sang Dios, 2) nasaksihan nga pagpamatuod sang mga manunulat, 3) ang may sistema nga pagpangusisa sang mga kamatuoran.




Si Mateo, Marcos, Lukas, kag Juan nagsulat sang Ebanghelyo nga ginhingalanan sang ila mga ngalan. Amo ini ang nahauna nga apat ka mga libro sang Bag-o nga Katipan. Ginatawag naton ini nga Ebanghelyo bangod kay ang *ebanghelyo* nagakahulogan sang *Maayong Balita*. Ang maayong balita nahanungod sa kon paano si Jesus nagkarri sa paghatag sa aton sang kabuhi nga walay katapusan amo ang pinakalabing maayong balita nga aton mabatian.

Makita naton ang mga katawhan gikan sa nagkalain-lain nga mga puntos. Tan-awa ang isa ka tawo nga kilala mo. Sa isa ka tawo isa sia ka kasilingan; sa isa, isa sia ka abyan; kag sa isa pa gid isa sia ka bana, amay kag manug-pangabudlay. Ang tanan makasulat nahanungod sa isa lamang ka tinuga apang ang tagsatagsa may nagkalainlain nga Paglaragway sa nasambit nga tinuga.



Ginbugnaan sang Dios si Mateo, Marcos, Lukas, kag Juan sa pagsulat sang Maayong Balita nahanungod kay Jesus gikan sa nagkalainlain nga puntos. Si Mateo nagapakita sa aton kay Jesus subong nga Hari — sa kaliwatan ni Haring David nga magadumala sang kalibutan sa pagkamatarung.

Si Marcos nagapakita sa aton kay Jesus subong nga Alagad sang Dios, nga nagabuhat sang kabubut-on sang Dios — ang nagaantos nga Alagad nga gin-laragway sa tagna sa Daan nga Katipan, nga nagkari agud mapatay bangod sang aton mga sala.



Si Lukas, isa ka manug-bulong nga Griego, nagapahayag kay Jesus subong nga Anak sang Tawo — ang himpit nga representante sang lahi sang tawo kag bulong sa bala-tian sang tanan nga mga katawhan.

Si Juan nagsulat sang iya Ebang-helyo agud aton makita si Jesus subong nga Anak sang Dios — ang Manluluwas sang kalibutan. Ang iya libro isa ka sinulat bahin sa kabuhi sang isa ka tawo nga nakilala niya. Tama gid sia kalapit sa Iya. Si Juan nagsulat subong nga isa ka saksi agud pamatud-an ang pila ka mga bagay — agud pamatud-an nga kon si sin-o si Jesus. Ang Iya handum amo ang paghaylo sang



tanang nga makabasa sang iya sinulatan nga ining si Jesus labaw pa sang sa isa ka tawo — Sia Dios nga nagkari sa dagway sang tawo. Kag ginpahayag niya nga ang tanang nga magatuo sa kay Jesus makabaton sang kabuhi nga walay katapusan. Isa ini ka daku nga dinalan — halos tuman gid ka maayo agud magmatuod. Apang samtang ginabasa naton sa Biblia kon ano ginsulat sang iban nga mga sumolunod ni Jesus nahanungod sa Iya, makita naton nga tanang sila nagahisugot. Ang ila ginasing nahanungod sa kay Jesus matuod.

Si Mateo kag si Juan duha sa napulog duha ka mga gintuton-an nga naghinguyang sang tatlo ka tuig kaupod ni Jesus sa Iya pag-alagad. Ginlaragway nila ang mga milagro nga nakita nila nga ginbuhat Niya, nagsulat sang iban Niya nga gintudlo, kag nagasugid sang personal nila nga nakita sang Iya pagkamatay kag pagkabanhaw. Si Juan naghatag sang kalig-unan sa pagka-Dios ni Jesus kag naghatag sang kabug-atan sa pagkamalahalon sang pagtuo sa Iya. Si Mateo nahanas sa pagtrabaho sa mga opisyal nga mga dokumento sang wala pa sia mahimo nga isa sang gintuton-an ni Jesus. Maathag nga ginpahayag niya ang kalig-unan nga si Jesus amo ang Hari nga ginapatungdan sang ginsulat sang mga manalagna sang Daan nga Katipan. Ginsambit niya ang mga ginpanagna kag ang ila katumanan, ginsubay niya ang harianon nga kaliwatan ni Jesus, kag ginlarawan niya ang mga prinsipiyo sang Iya ginharian.

Si Marcos isa ka pamatan-on nga nagapuyo sa Jerusalem sa tian sang pag-alagad ni Jesus sa amo nga duog. Mahimo nga isa sia sa kadam-an nga nagpamati sa wali ni Jesus, nakakita sang Iya mga milagro, kag nakakita sang Iya pagkalansang. Sang ulihi si Marcos nangin malapit nga kaupod ni Pedro (isa sang mga gintuton-an ni Jesus) kag mahimo nga nakatuon sa kay Pedro sang pila ka mga detalye nga nasulat sa iya ebanghelyo.

Si Lukas ang manugbulong nga nagpangusisa sang maayo gid sang mga balita nahanungod kay Jesus. Nagsulat sia sang duha ka libro (ang iya ebanghelyo kag ang ang Mga Binuhatan) agud mahatagan ang isa ka kinilala nga abyan sang isa ka walay sayop nga sinulat sang kabuhi ni Jesus kag sang pagtubo sang Iya iglesia. Personal nga nagpakighambal si Lukas sa kay Maria (ang iloy ni Jesus) kag madamo pa nga iban sa paghibalo sang mga detalye sa milagroso nga pagkabun-ag, kabuhi, kamatayon, kag pagkabanhaw ni Jesus. Gin-usisa niya ang madamo nga mga pag-ayo nga ginbuhat ni Jesus kag ginlaragway kon ano ang natabo.

Ang mga manunulat sang iban pa nga bahin sang Bag-o nga Katipan — sanday Pedro, Santiago, Judas, kag Pablo — tanan takos gid sa pagsulat nahanungod kay Jesus. Si Pedro nangin kaupod ni Jesus sing tatlo ka tuig subong nga Iya gintuton-an. Si Santiago kag si Judas utod ni Jesus. Si Pablo isa ka masupog nga kaaway ni Jesus kag sang Iya mga sumolunod. Apang nasugata niya si Jesus sa isa ka dalan nga nagpabag-o sing lubos sang iya kabuhi. Halin sadto ginhinguyang ni Pablo ang iya kabuhi sa pag-sugid sa iban nahanungod kay Jesus.

Ginbugnaan sang Dios ining mga tawo sa pagsulat para sa aton (subong man sa mga katawhan sang ila panahon) kon ano ang ila nahibaloan nahanungod kay Jesus. Nagahilisugot ang ila mga sinulat. Paagi sa ila inagihan ginasugiran nila kita kon paano nga kita man makakilala kay Jesus kag makahimulos sang tumalagsahon nga kabuhi nga ginahatag Niya. Si Juan nagsiling nahanungod sini nga:

1 Juan 1:3. Yadtong amon nakita kag nabatian ginaasoy namon sa inyo man, agud nga kamo man may pagpakig-ambit sa amon; kag ang aton pagpakig-

ambit upod sa Amay kag sa Iya Anak nga si Jesu-Kristo.

Buhata Ini

8. Sauloha ang 1 Juan 1:3.
9. Sin-o ang mga manunulat sang apat ka Ebanghelyo?
.....
10. Hingalani ang manugbulong nga nagsulat nahanungod kay Jesus pagkatapos sang mainandamon nga pagpangusisa.
.....
11. Sin-o ang masupog nga kaaway ni Jesus nga lubos nga nagbag-o sang masugata Niya ini?
12. Ano ang pagsaysay sang Bag-o nga Katipan nahanungod kay Jesus?
 -a) Isa ka tinipon nga kasaysayan nahanungod sa isa ka baganihan sang nahaunang siglo.
 -b) Isa ka sinulat nga ginpalatonlaton sa sulod sang malawig nga panahon bag-o ini masulat.
 -k) Isa ka sinulat sang mga katawhan nga nakakilala kay Jesus ukon nakahibalo sang mga kamatuoran paagi sa personal nga pagpakighambal sa mga nakakilala kay Jesus.

Pagtuon Gikan sa Inagihan

Buhi si Jesus kag mahimo naton Sia nga makilala sing personal! Bahin ini sang maayong balita sang ebanghelyo. Ginahimo man gihapon ni Jesus para sa mga katawhan ang katulad sang ginahimo Niya sang una nga panahon.

Inagihan sang Iban

May nakilala bala ikaw nga nakakilala sing personal kay Jesus? Labaw pa ini sang sa pagkilala lamang kay Jesus, ukon pagka katapo sang isa ka Kristohanon nga simbahan, ukon ang pagkatinawag nga Kristohanon. Ang personal nga pagkilala kay Jesus naga-bag-o sang kabuhi sang isa ka tawo. Minilyon ka mga katawhan karon ang matuodtuod gid nga nakakilala kay Jesus. Malipay sila nga magsugid sa imo nahanungod sa Iya. Ang iban sa ila nagasiling:



*Sang una ginakaugtan ko ang tanan nga mga tawo, apang sang nagkari si Jesus sa akon kabuhi ginbag-o Niya ako. Karon ginahigugma ko ang mga katawhan kag naluyag nga magbulig sa ila.

*Sang una nagaantos ako sang tuman kalain nga balatyagon bangod sang sala apang ginkuha ini tanan ni Jesus sang magpangayo ako sang kapatawaran sang akon sala. Ginhatagan Niya ako sang kalipay, paghidait, kag isa ka matinlo nga konsensya.

*Ginkuha ni Jesus ang kahadlok nga nagtublag sa akon. Ginhatagan Niya ako sing kaisog sa pag-atubang sang akon mga palaligban.

*Ginhatagan ako ni Jesus sang kabangdanan sa pag-kabuhi, isa ka katuyoan sa kabuhi.

*Si Jesus ang sabat sa tanan ko nga mga palaligban, ginadala ko ang tanan sa Iya sa pangamuyo. Ginpa-

hayag Niya sa akon kon ano ang akon pagabuhaton kag ginasugata man Niya ang tanan ko nga mga kinahanglanon.

*Indi na ako masinulob-on karon bangod kay kaupod nakon si Jesus sa tanan nga tion.

*Nasiod ako sa “heroin”, apang ginkuha ni Jesus ang akon paghingabot sang ginadumili nga bulong sang gintugyan ko ang akon kabuhi sa Iya.

*Madamo nga mga beses nga gin-ayo ako ni Jesus bilang sabbat sa akon pangamuyo.

Ining mga pagpamatuod kag linibo pa nga iban halin sa mga katawhan nga matuodtuod gid nga nakakilala kay Jesus karon nagapahayag sang kamatuoran sang kon ano ang ginasiling sang Dios:

Mga Hebreo 13:8. Si Jesu-Kristo amo man kahapon kag karon kag sa ginapon.

Buhata Ini

13. Sauloha ang Mga Hebreo 13:8.
14. *Hunahunaa:* Kon makabati ikaw sang mga katawhan nga nagasugid sang ila mga inaghan sa kay Jesus katulad sang nasulat sa ibabaw, ano ang hunahunaon mo? Buot mo bala nga makilala si Jesus? Ining matuod nga mga pagpamatuod nakapahayag bala sa imo nga si Jesus amo man ang sabbat sa imo mga palaligban?

Personal nga Inagihan

Paano nimo makilala sing labing maayo kon sin-o si Jesus? Madamo ang matun-an mo nahanungod sa Iya paagi sa pagtuon sang Biblia. Makit-



an nimo sa Biblia ang nahanungod sa Iya kabuhi kag sang Iya mga ginatudlo. Matukiban mo kon ngaa nga nagkari Sia sa kalibutan kag kon ano ang ginbuhat Niya para sa imo. Ang Biblia magasugid sa imo kon ano ang ginahimo ni Jesus karon kag kon ano ang pagabuhaton Niya sa palaabuton. Makatuon ikaw nahanungod kay Jesus paagi sa inagihan sang iban. Sa nagliligad nga mga tinuig, sumogod sang si Jesus nagkabuhi diri sa duta tubtob sa sining takna, natukiban sang mga katawhan nga si Jesus nagapakilala sang Iya kaugalingon sa mga katawhan nga buot gid makakilala sa Iya. Kag ang labing maayo sa tanan, amo nga makilala mo man Sia sing personal kag makatuon sa imo maagihan nga matuod ang ginasiling sang Biblia nahanungod sa Iya.



Mahimo nga nakilala mo si Jesus sa bug-os mo nga kabuhi, ukon wala pa ikaw sing tuman nga nabatian nahanungod sa Iya, ukon kaangay ni Pablo — nga ang kabuhi nagbag-o sang personal niya nga nasugata si Jesus — mahimo nga kaaway ikaw sang ebanghelyo. Bisan ano ang imo

pagkilala kay Jesus kag bisan ano ang panimuot nga ginpatuhoy mo sa Iya, ining mga leksyon ginsulat agud nga mabuligan ka sing dugang pa gid sa pagkilala sa Iya sang personal. Kag samtang ginabuhat mo ini, magalaum kag magapangamuyo kami nga malingaw kag malipay ikaw sa tumalagsahon nga mga kaayohan nga nagaabot bangod sang imo pagpakig-abyan kay Jesus.

Buhata Ini

15. Ginsulat para sa kay sin-o ining mga leksyon?
 -a) Sa mga nakakilala lamang kay Jesus.
 -b) Sa mga wala lamang makakilala.
 -k) Sa bisan sin-o nga buot makakilala kon si sin-o si Jesus.
16. Pilia ang tatlo ka labing maayo nga paagi sa pagkilala kon sin-o gid matuod si Jesus.
 -a) Tun-an kon ano ang ginasiling sang Biblia nahanungod sa Iya.
 -b) Tun-an kon ano ang ginasiling sang iban nga mga relihiyon.
 -k) Tun-an ang pagpaanggid sang mga relihiyon.
 -d) Pamatian kon ano ang ginbuhat ni Jesus sa mga katawhan nga nakakilala sing personal sa Iya.
 -e) Kilalahon sing personal si Jesus.
 -g) Pamatian ang mga ideya nahanungod sa Iya.
 -h) Pamatian kon ano ang ginasiling sang mga kaaway ni Jesus.
17. *Hunahunaa:* Ang paghibalo sing dugang pa nahanungod sa kon sin-o si Jesus makabulig sa imo sa bisan ano nga paagi. Paano?
18. Pagkatapos nga napaanggid mo ang imo mga sabat sa husto nga mga sabat nga yara sa madason nga pahina, tan-awa ang imo rekord sang bumolutho kag sulati ang bahin para sa leksyon 1.

Leksyon 1 – Mga Sabat

Ipaanggid ang imo mga sabbat sa mga sabbat nga nakasulat sa idalum kag gradohi ang imo kaugalingon. Magahatag ikaw sang 20 ka sabbat sa mga pamangkot (may yara nga sobra sa isa ang sabbat). Kon may yara ikaw nga halin sa 18 tubtob sa 20 nga husto, markahi ang imo grado sang labing maayo, Halin sa 14 tubtob sa 17, maayo; 10 tubtob sa 13, nagakaigo. Kon manubo sa 10 ang husto mo nga sabbat, basaha liwat ang leksyon agud nga mahihaloan mo ini sing maayo.

1. d) Isa nga labaw pa sang isa lamang ka manunodlo, manalagna, ukon mahigugmaon sang kaalam.
2. b) sa katung-an nga sidlangan
3. a) sa Biblia
4. b) ang tanan nagasimba sa isa lamang ka Dios.
d) ang Dios nagpahayag sang Iya kaugalingon sa ila kag naghatag sang Iya mensahe.
e) ang tanan nagsulat sang kon ano ang ginsiling sang Dios sa ila.
5. b) kaluwasan sang makasasala nga tawo paagi sa mahigugmaon nga Dios.
6. ang Daan nga Katipan.
7. ang Bag-o nga Katipan
9. Mateo, Marcos, Lukas, Juan.
10. Lukas
11. Pablo
12. k) Isa ka rekord nga ginsulat sang mga katawhan nga nakakilala kay Jesus ukon nakahibalo sang mga kamatuoran paagi sa personal nga pagpakighambal sa mga nakakilala kay Jesus.
15. k) Sa bisan sin-o nga buot makakilala kon si sin-o si Jesus.
16. a) Tun-an kon ano ang ginasiling sang Biblia nahanungod sa Iya.
d) Pamatian kon ano ang ginbuhat ni Jesus sa mga katawhan nga nakakilala sing personal sa Iya.
e) Kilalahon sing personal si Jesus.

Kadamuon sang husto nga sabbat.Grado.

Karon sulati ang imo rekord sang bumolutho para sa leksyon 1.